

**Maki Nasumo Naña**  
**PITA**  
**Siriyuia**  
**Visayuena Na Tusi Nene**

*Suniena plas na tusi nini*

Maki p̄esa kiena Pita, siria pan la naña amlelaga rui, naña naga pio la sape yeririna lala kiena Ntewa, naña naga ga pisirplan la. La naña asu tetai asike sane wolawa lala e provens makega e yo nene naña nagane tepio sape purvanua naña Teki. Sitomena keviu na m̄aki nini, vena visirluaen sitomena kiena li nalelagaena la naña yaru la asum̄a akila ke m̄arera manene panila pañisi, kila la aṃal ke m̄arera panila pañisi komin naña amlelaga e Yesu Kristo. Naga pisa panila sape monar asitoṃal lologena wo nene, naña Yesu Kristo maren ita, a mal sina, a yoko naga wasuṃe si vitomi sina vena were kiena yeririna lala. Sitomena nene kilia iila ita vena tesuṃalu m̄arera, a kieta lelagaena la kilia m̄arera suṃa e Yesu Kristo.

Komin suri ne nanene, pogos naña atol pog m̄arera, a yaru la akila suri m̄arera la panila, akilia asum̄alu m̄arera, kiela sitomena taṃtatete loru, pe suri korena ga naña yaru la akila piowa manene panila. Visae akila sanene, yoko kila meraravan naña la amlelaga kemua e Yesu, a yoko atol suri wo la naña Ntewa miligan ruru

sike mae peni, sape ve kiena kiena yeririna lala, e legiena naña yoko Yesu Kristo vitom m̃alivi ea.

Amio visena nene na visirplanen kiela sitomena lala, naga pisi m̃arera m̃enaga panila, sape monar akila kiela maliena la mesmesu ruruia, komin naña ape yaru lala kiena ne Kristo.

*Kompañasnen tusi la na nini*

Visena ñesa 1:1-2

Mrapa kiena Ntewa naña tamalia kiena yeririna lala 1:3-12

Maliena kiena li nalelagaena lala monar ve wa 1:13—2:10

Yum̃aena kiena li nalelagaena lala pogos naña asike e nalogeviowaena 2:11—4:19

Sitomena kiena yaru na lelagaena monar vito ga tano 5:1-11

Visena na maro 5:12-14

*Visena na sumo*

<sup>1</sup> Erau lala, inu Pita nevisa pokolulagi a pokolemalo e kia kiena Yesu Kristo, naña in na nepe kiena nalogena.

Maki nini piñasu pan amiu yeririna kiena ne Ntewa lala, naña nanua asike gar kiamiu yo Yerusalem, ana añene plan amiu, nagane kam na ape wolawa ga naña asike e pupia lepas la naña, Pontas, Kalesia, Kapatosa, Esia, amio Pitinia.

<sup>2</sup> Amloge piowagania, ana sineun nesape nevisawal van amiu, Ntewa armata naga kilia make mrapa na kiamiu malena nanua nanua rui. Naga mligan plan amiu nanua rui, ana Ninuna miyum̃ae ke e amiu, amlogear Yesu Kristo, amla

e kiamiu malena, kana kuruta kevan amiu amekiki, apim ape kiena yar wa lala.

Kiau leniena nesape yoko naga ligan kiena lemamiena a sumare vena sumã iila amiu silaga.

*Natamaliaena naþa nalelagaena la atolia*

<sup>3</sup> Popon tesitomãal sanape naþa Ntewa Armanane kieta Suþe Yesu Kristo, naga kilali po pan ita wa. Temieluar naga paþisi, komin sinen miye ita laa, kila ita tepim tepaeme tepe urviu si e mratava puna. Sa naþa naga kila narina Yesu Kristo mal si e marena, tekilia naþa suri naþa sike vamon ita, pe maren re si poli ana malena naþa ve uro re.

<sup>4</sup> Naga sane lalimana ne Ntewa naþa po naþa yoko tetol sirau. Naga kila ruru rui, mligan sike ma meta e peni, yoko taþatete menun, a taþatete viowa, taþatete si kovio pog tai.

<sup>5</sup> Sur nene pe tetol re poli wa, ana temlelaga tesape yoko namãreraena kiena ne Ntewa suwo ruru ita nenaga, uarar ruru ita sumã vano-o tol legiena maro. Ana e pogos nene, yoko naga kilologia natamalia itaena e maran yar taþena lala.

<sup>6</sup> Nekilia nesape nanagane, asumã aþar nau-rmiena na loge viowaena e nakilaliena la naþa asumã atol ke ne. Pona yoko sumã ga sanene yo e pogos laþas naþa pimi ke na wa, ana e sitomen la ne nepisa þisi ne, popon kila amiu akekara, sinemiu la loge wo sina.

<sup>7</sup> Sur na kilalien la nene, apimin ga naþa kila kiamiu naviawaena sumãal laa sane, imi mãrera ruruia. Nanene naga sa naþa kol naþa visae

sinelan asape ikik ruru wo, monar askap plan kororak la naña sike ea, pona omlelege kiai okaweruruia imi mesmesu, ana ita mēna ga sa ke ga. Nakilaliena la naña tetol ke ne, sane kap tai naña kekanvan ke kieta naviawaena vena imi merarava ruruia, a mārera ruruia. Visae pogos naña Yesu Kristo imi sina, naga lual kieta naviawaen ekik ruru sanene, ana yoko ita make ga tekekekara, tekilia tevisu ruru ita, teloge wo vaḻisi.

<sup>8</sup> Nesuñña nepisayu ke Yesu sa nene, nesitoñal si nanua sumo nesike nemio naga, nekilia ruru naga, kam na peraga. Lelaga naña nanua kam na pe amio re naga poli, ana pe sur koren ga, nagane na kam na akekan paḻisi, a pe apisuli re naga e kilamaramiu poli, ana asuñña amlelaga ruru ke mārera e naga, sinemiu la kekan e pupia kekarena ta ne keviu paḻisi, naña pe atorokin re avisa meraravan poli.

<sup>9</sup> Kiamiu kekarena nene, pe kiamiu mras nen nalelagaen wo tai naña akilia akan nagane, ana pe naga re ga nene poli, komin amio mēna, e pogos la ne pimi ke ne, yoko akan tai naña kiki laa sane, nane natamaliaen kiamiu malena.

<sup>10</sup> Sur nene naña tepisayuia, sa naña natamaliaen malena ken yaru, naga sur tai naña navisawalen nasumo la aḻion kiliaen paḻisi. Akilia ruru navisaarena kiena ne Ntewa po, naña sape yoko naga sinen ye kiena yeririna lala, yoko tamalia la, ana asuñña apisawal ke sanene.

<sup>11</sup> Apisa ke sanene, ana pe akilia meraravan re asape yoko naga kila ve sanape poli, pona

yoko kila pogwai. Amloge ga naña Ninuna Navisaarena suña kipian la ke sape yoko akila kare p̄esan naga, siraunia, navisa ruruena lala imi m̄alm̄aliv, ana aminue asape Navisaarena naga yar na sanape, pona naga ai.

<sup>12</sup> Sumo na asitom asape naga yerkaŋa yar ga tai na kiela pogos ne, ana siraunia, apisu kilale ga na wa asape sur la naña apisa ke ne, pe e re e kiela pogos poli, a e kieta pogos la ne pimi ke sirau. Ana kam m̄ena apisu kilale asape suri la naña navisawalena la apisawal nanua sumo, nane apim ape lelaga e visena kiena lologena wo naña memlologon ke pan amiu e nañareraen kiena ne Ninuna Wa nae ma e peni rui.

A pe navisawalen re ga la poli, ana navisi m̄ena lala sinelan asape akilia sur la nene, ana peraga, pe kiela re naña akilia poli. Sur la nene añalivi ga yo metava e kieta pog na wa.

### *Monar ove yar wa ruruia*

<sup>13</sup> Ana pogos naña Yesu Kristo pitomi m̄aliv e yomarava e nena e kieta pogosa, ita ke narui monar tekila ruru kieta sitomena vena toñareran ruru naña tekila kiena yumaena. Monar takawe ruru kieta malena, a ve tesitom re yomarava nini, a monar tesitomañal ga navisa ruruena wo naña yoko towaria pogos naña yoko Yesu vitom warpo si yo e yomarava nini.

<sup>14</sup> Yoko monar teim teve sa sisi wo la naña asuña amlogear ruru ke armala, a nasinenanen viowa na wowe lala, pe pon re si tetañan ave suñen kieta malena poli, sa nanua sumo e pogos naña pe tekilia re sur tai poli.

<sup>15</sup> Armata, naga ke narui naga pio ita, ana monar tekilia tesape naga naña sinenan sape teim lavisinia, naga pe wa pañisi, ana ita mēna monar teve wa ruru e mrapa make ga na kieta malena.

<sup>16</sup> Visen kiena ne Ntewa tai teke e kiena navisaluaena marua, pisa sanene rui sape  
*“In na nepe wa, kam mēna monar ave wa.” Lev 11:44,45*

<sup>17</sup> A sur si tai, yam mokliu naña tesuñā tepio Armata vena iila ita, ana monar tevisu kilale tevisave naga suñā pisuveve ruru yaru lala mesmesu ga e kiela yuñāena la peve taaga, ana teyaloro e yomarava nini monar kieta sitomen vatanonia, temaraunia. Naga mligan ita tesike e yo nini yam plas ga sane ita tepe wolawa ga ea, ana monar tesitom tevisave siraunia, yoko teva tesuñal nena tesu e marana.

<sup>18</sup> Nanua sumo, kieta li marua lala pe akilia re Ntewa poli, ana akiakian lelein mā kiela malena na yemalolo pitomi pitomi tol pogos naña Yesu Kristo pimi ñerelua ita petania. A sa naña akilia, naga kila sanene, pe pul plan ita re e sur na yomerava sane kilavaru poli pona kol pona ya si naña sane yoko kovio pogos tai.

<sup>19</sup> Peraga, naga pul plan ita e kana kuruta nena napo, komin naga tañan kiena malena kus leleta, naga tañan naga sane narin sipsip tai naña pe narin maran sur tai pe to re e poli, vena kilaen kuñañaena ea.

<sup>20</sup> Ntewa kilalua Yesu vena tamalia itaena sanene nanua rui. Nanua e pogos naña si yomarava, ana ñuarar narina nene suñā amio

pano tol pogos naþa sinen miye ita keviu, narui kila naga pitomi m̃aliv ga na wa e legien maro la nini.

<sup>21</sup> Naga pitomi m̃alivi, naga pike mrapa pan ita na vaen si puna ne Ntewa po pañisi. A pogos naþa toñal naþa Ntewa kila malia si naga, mli-gan sike amio naga ma e kiena naurarena, toþar sitomena naþa tesape, Ntewa ne nanene narui, popon telelaga vania, teviawa ea, towasinea.

<sup>22</sup> Siar e nene narui, amlelaga e visena lelaga kiena ne Ntewa, a kiamiu malena la mesmes ruru po, a asitom manene laa kiamiu erau taþena lala. Ana ve akilakila re ga, monar am̃areran li naþa akekaran amiu e sinemiu lala ve keviu manenea.

<sup>23</sup> Apaeme apim ape urviu sina, atol malena viu rui, ana nanene na pe sa re naþa m̃am̃a la aþar sisi poli. Kieta malena viu nene naga pimi þarpo ga yo e visena kiena ne Ntewa, pe visena mali, a visena naþa taþatete kovio pogos tai.

<sup>24</sup> Malena kien yar taþatete su ve piavi, komin kapur ruru po sane m̃aki, kilia imi wo vañisi sane meme, ana siraunia m̃ak nene kilia mano, ana meme kilia loru.

<sup>25</sup> Ana sur taaga naþa sike sike lue, nane visena kiena Suþe.

Ana visena ne nane, mesum̃a memlologon ke pan amiu siar nanua rui pimi tol þane.

## 2

<sup>1</sup> Ana komin naþa lologena wo tol amiu rui, monar aligan þelaga viowa lala. Nasinekareena lala, visokanen lala, namlamulen wanen viowa

lala, vielueen lala, a navis viowaena lala, ðelaga la ne sanene monar awar plan vetan kiamiu malena.

<sup>2</sup> Sa naþa sisi tomtom la sinelan manene munen mñala yu vena amal ea, kam mñena monar amñareran naþa atol kamiu kinanena a namunena wo naþa kilia kila ninumi kapur imi marua ruru, torokin ðelaga kien yeririna la naþa Ntewa tamalia la.

<sup>3</sup> Akan li kinanena kana Suþe rui, a visae akan kiki, popon akan lue ga, mñeþemiu ulen silaga.

*Yesu naga pe purþes nen kilavaru na þeren yuñã naþa mali*

<sup>4</sup> Ntewa sinena sape visirlua yuñã wa tai, ana naga pisaar kilavaru na þeren yuñã tai naþa mali, naþa pisu po paþisi, nane Yesu. Yar taþena laþasa yepel mavinia, akovenlua, ana ita tesitom naga paþisi, tetavevea.

<sup>5</sup> Ana Ntewa þere ita, pisirlua ita tesu meta e kilavaru nena, naga pran kolkol ita sane kilavaru mali lala na mñana yuñã nena. Naga pisu ita sane kiena þegas nen yar wa na yuñãena lala, naþa tekilia towar kuþaþaena nowo vania naþa naga kekaran la, naþa towar vania komin ga yuñãena naþa Yesu Kristo kila rui.

<sup>6</sup> Sa ga visena tai naþa sike e tus kiena yermarua navisawalen Aisea rui, naþa Ntewa sape:

*“Apisu kilale rui pona pere wa? In na nepisaar kilavaru wo na þeren mñau yuñã tai rui, naþa nekekaran paþisi. Yoko nevisirlua nena se kiau kumali wa naþa Saeon.*



*Yaru ai naþa visirlua kien malena se ea, taþatete nena loru vito viowa pog tai.” Ais 28:16*

<sup>7</sup> Ana ita naþa temlelaga e kilavaru nene, tesape kieta visuena po na po, ana laþasa pe sinelan re poli, akovenlua ga pano. Ana visen taþena mþena kiena ne Ntewa e lepas nene sike e Tus na Yauena lala, naþa sape:

*“Pe sur koren naþa yar na yuþaenen yuþa asape kilavaru nene piowa ga, akovenlua, ana in na nemla kilavaru nena, nekila naga pe kilavaru na þeren mþau yuþa wa nena napo.” Ais 8:14*

<sup>8</sup> A e ke sina e Tusi kiena Aisea, visen kiena ne Ntewa tai pisayu ke kilavaru nene wa, pisa sanini, sape:

*“Kilavaru nene, yoko yar ve mok naþa lala tau ea, kila ayal wowe.*

*Naga pe kilavaru tai naþa yoko kila yeririna na yomarava nini aloloru.” Ais 8:14*

Visae teviun tevisave ya ne kila amlolor sanene, naga komin ga naþa pe amlogear re visena lelaga naþa amloge poli, yoko akekapil make atotano e lele na kovioena naþa su ruru sike pa rui ve kiela.

<sup>9</sup> Ana e ita pe sa re nene po, ita tepe þegas taaga naþa Ntewa pisirlua, ita tepe li na þarwa lala vena ve suþenen kiena yo, ita tesike loyuþa e kiena purvanua wa, ita tepe yeririna na mratava nena puna lala. Ita ke narui tepe yeririna na yeluaren naga vena visawalen kiena sinewo naþa kila pan ita, naþa þere plan ita petan

yemalolo, mligan ita tesike e kiena yomerarava napo.

<sup>10</sup> Nanua sumo ita tepe yeririna kar ga lala, ana nagane tepim tepe þegas kiena ne Ntewa taaga. Nanua sumo pe tetol re kiena sineyeena poli, ana nagane kiena sineyeena pulen ga kieta malena.

<sup>11</sup> Erau lala, visae ve sanene, popon avisu kilale naþa yomarava nini pe mña uña re napo poli. Sa ga tepe yar taþena ga lala, tepe sane wolawa ga, ana monar teligan þelaga nasinenanen nakilaen mlamulen viowa lala na yomerava nini, komin kiena napiowaena lala ape nasinekar nena na ninuta.

<sup>12</sup> Sila ga tesike likan la naþa yepel mavin lelagaena, akawe ita silaga, a pogos naþa tesike e marala, kieta malena monar wo na wo. Visae ve sanene, yoko akilia avisu kilale ya naþa tesuña tekila ke ne naga po na po, ana visae la mña alelaga, yoko ita make ga temio la teieluar Ntewa e pogos naþa yoko imi mñalivin ita sina.

*Pelaga wo kiena li nalelagaena lala pogos naþa asike e yomarava*

<sup>13</sup> Sa naþa tepe li nalelagaena kiena Suþe rui, kieta þelaga naþa tesike e yomarava nini monar torokin ga kiena kia naþa tesuña temlologonia. Li nalelagaena lala monar avatanon yerkawa la naþa apisir plan la vena visuaren yeririna lala. Suþe la yo, pona yerkawa kerkeviu lala,

<sup>14</sup> pona þarin suþe keviu la, ana monar tevisu kilale la sane Ntewa ke narui naga mligan e limala vena liþereen yar lala, vena laen nakoan

va naŕa pe mesmes re poli, a vena yeluaren naŕa kila yuŕaena wo.

<sup>15</sup> Ntewa sinenan sape kiena yeririna la monar ayuŕaena wo, komin naŕa visae akila ŕa sanene silaga, yoko yar la naŕa pe akilia re sur po, naŕa asuŕa akoven ke ga visen kar lala kawe ita, yoko taŕatete avisa si sur tai.

<sup>16</sup> E lepas tai, lelaga sane tekilia tekila ga ya naŕa sinetania, a e lepas komŕasa, yar naŕa mlelaga naga pe sitom manene re sanene po. Pona naga sitom ke sape visa ve sa nini yo, visave Ke, sur nene sike ga e in naŕane, nekilia nekila ga suri viowa ya naŕa sineunia. Ana pe sa re nena nene poli ŕisa, komin monar tevisu kilale tevisave ita la naŕa temlelaga tepe yar na yuŕaena kiena ne Ntewa, ana monar tekila ya naŕa naga sinenania.

<sup>17</sup> Li nalelagaena lala monar avatanon yar taŕena lala, monar akekaran manene wenla taŕena lala amio vinela taŕena lala e nam-ratava puna ne Ntewa. Monar amaraun Ntewa, avatanonia, a monar avatanon ŕena kiela suŕe lala.

<sup>18</sup> E ŕegas nen li nalelagaena lala, laŕasa ape kiena ne yerkawa lala, naŕa ayuŕaena korena ga van la. A kiela yerkawa lala, laŕasa apowo paŕisi, a laŕasa aŕarera paŕisi, ana pe sur koren ga naŕa yerkawa naga po pona piowa ga sanene, ana yar na kiena yuŕaena monar vatanon ruruia.

<sup>19</sup> Pogos la ŕasa, pona yar na yuŕaena miyuŕaena pogaga yo, ana kiena suŕe kilia sinen karkare vaŕisi, kilia viowa lue ga vania. Yar nene yoko loge viowagan ŕelaga kiena ne kiena

suṽe naṽa pe mesmes re poli, ana po paṽisi visae torokin taṽan ga ve sa nene, naṽa e kiena sitomena ṽasine ga Ntewa, ana yoko loḡe kilale naṽa Ntewa sike amio vena iilaena.

<sup>20</sup> Ana visae yar na yuṽaena kila sur viowa ve moki, pona yoko kiena yerkaḡa monar visave ala nakoena vania. Ana visae pogos naṽa ala nakoena van yar nene, naga va ruru ga teke na, yoko ve tevisa re tevisave naga pa ruruia komin naga pe yar wo tai, ana tekilia tevisave naga pe pis re poli komin pisu kilale kiena napiowaena.

Ana visae okila ga sur wo la sa naṽa Ntewa sinenania, asuṽalu sinela kar ko, ala nakoena ṽarera tai van ko, ana ova ruru ko ga, ṽelaga wo ke narui naṽa Ntewa sinenania.

<sup>21</sup> Sur nene naṽa yar wo loḡe viowa ga naṽa akila piowa pania, naga pe lepas nen kieta malena tai naṽa Kristo pio itania, komin sa kemua nene pan naga sumo rui. Pe kila re sur tai poli, ana akila naga mloḡe piowa manene laa, ana naga taṽan ga, vanon ita. Ana sa ke ga mrapa naṽa kieta Suṽe mial kome nanua sumo rui, monar teyal ga e lelen lana tetaveve tevano.

<sup>22</sup> Visena Wa marua pisayu naga sumo rui, naṽa pisa sanini, sape

*“Naga pe kila re nena mlamulen viowa pogos tai poli,*

*visena na visokanena pe kate li re e gona poli.”*

*Ais 53:9*

<sup>23</sup> A sa ke ga naṽa tekilia ṽaga, pogos naṽa akuan visen viowa la pania, pe pisamaran re si poli, a pogos naṽa aṽe kare yepen lala, pe pisa re nena sur tai pan la. Pa ruru ga mon

mãaga, mligan sur make ga sike ga e limana ne Ntewa Arimana naãa kiena naliãereen lala mesmes make ga.

<sup>24</sup> Pogos naãa Yesu telan mẽeke e lak torovia, nakoena na kieta mlamulen viowa make ga mloru e tasnena, a kiena marena kila naãa ãelaga na mlamulen viowa mare petan ita, ana kila ãelaga na kilaen mesmesu mal sunãa e kieta malena. Lelaga, kiena yepe lalaea lala kila kieta yepe lalaea lala pimi po nenaga.

<sup>25</sup> Sumo, tesunãa temyal wowe sane sipsip la naãa akila pal kiela mrapa, ana nagane yar na visuaren sipsip mãal ita si rui, nagane tepim tesu ruru tesike temio naga naãa pe yaru navisuarena kieta malena.

### 3

#### *La naãa atalopa rui monar avatanon wola lala*

<sup>1</sup> Sa naãa ita la naãa temlelaga monar tevatanon ãarin suãe na purvanua, ita naãa tetalopa monar tevatanon mẽena wota lala.

Nevis ãesan van amiu kam sira lala, nesape monar avatanon ruru womiu na yermene lala. Pona sira tai, wona na yermene pe mlelaga re e Tus Wa poli, yepen mavin yagogonen wona na sira visayu vania, ana visae wona na sira kila lue ga wo vania, pona yoko kilia were mẽena naga imi lelaga yo.

<sup>2</sup> Visen manenea taãatete taulu yar nene, ana pogos naãa visuveve ãelaga na sitomena wa a

ĵelaga na vatanoena kiena wona sira nene, yoko naga kekaran naĵa lelaga.

<sup>3</sup> Sira lala, popon avisu kilale naĵa sane kiamiu purĵes nen nawoena pe vanon re naĵa avilovilon vilĵarimiu veve taĵena poli, pona atelan mraĵalela lala, pona ayen kulmrae wo lala.

<sup>4</sup> Sur nene, pe komin re naĵa apaia ruru tasnemiŭ la sanene poli, ana ya naĵa yoko kila amiŭ aim awo ruru napo lelaga nane ĵelaga wo naĵa teke loyuma e amiŭ. Ee, lemamiŭna naĵa malumu a sinemiŭ naĵa vito ga tano, naga ke na kiamiu nawoena narui, a naga taĵatete imi ve urmarua pog tai, nane ĵelaga ne nanene Ntewa pisu po paĵisi.

<sup>5</sup> Apua sira marua nasumo lala, la mĵena kiela ĵelaga la sa ga nene. La aĵasine Ntewa, ana amlelaga asape naga ga kilia iilala aim awo manene e marana a e maran yar taĵena lala. A pogos naĵa ola na yermĵene mĵena lala apisu naĵa wola na sira la nene apatanon ruru la sanene, apisu po na po.

<sup>6</sup> Sira tai naĵa kilakila sanene naga sira marua Sera, naĵa naga kekaran patanon ruru wona yermarua Epraam, pano pano-o pio ke naga sape kiena suĵe. Sira marua Sera nene, tepisu ke naga sane aneta sira marua tanea, ana kam sira na nagane lala, visae asuma akila luen ga wo va womiu lala, sa naĵa naga kila, kam na aim ave narina nena napo lala. Pona laĵas amaraun asape sa ĵisi akila ve sa nene va wola

na yerm̃ene lala yoko ve sanapen la, ana peraga, monar avatanon la ve sa naña Ntewa sinenania.

<sup>7</sup> Ana visena van amiu kam yerm̃ene lala, sape monar asitom urmi manene e womiu na sira lala. Visae yar tai sike um̃a m̃ana amio wona na sira, monar visu kilale sape naga yerm̃ene, naga m̃arera manenea, ana wona na sira, naga pe m̃arera manene re sane naga poli. Monar sitom̃al silaga sane Ntewa pe mla re ga malena viu pa yerm̃ene naga taaga poli, ana mla ga pan la luoka, yerm̃ene amio sira la ga luwoka maran taaga.

Ana visae yerm̃ene tai ve m̃arera manene re va wona, ana kiena sitomena vito ga tanonia, malum ruru wo vania, yoko lotena kiena lalua nene ve va map re ga mrapa komsusa, ana yalen silau va tol yo e naña Ntewa sike ea.

*Monar avatanon amiu vena kiamiu sitomen la imi ve taaga*

<sup>8</sup> Visen maro tai e lepas nene, nesape popon ala ruru sitomen la ne nepisawal ma meta ne. Kam punu ga, monar am̃areranli naña silaga asu ruru amio amiu naña kiamiu sitomen la imi ve taaga ga. Sinemiu ye amiu, akekaran naña sane kam na ape mratava taaga, awo van amiu, aligan amiu asike sina vatanon amiu.

<sup>9</sup> Naga naña kila piowa pan ko, ve okila maran re si viowa vania, a naga naña viuelin ko, ve oviuelin maran re sina. Visae ya naña imi van ko, yoko osum̃a ola ga navisatam̃eena navisa ruruena wo vano. Pelaga wo la ne sanene Ntewa

pio itania, vena tela ve sanene silaga, a visae tela navisa ruruena va yar tañena, yoko Ntewa ligan kiena navisa ruruena sike e kieta malena.

<sup>10</sup> Navisaarena la ne sanene sike e Tusi na Yauena la rui, naña pisa sanini, sape:

*“Yar naña kekaran sape su ruru suña wo e yomarava nini, pona sinenan sape kiena malena va wo, ve piavi, monar kilawo visena viowa lala ve molue re kome pulgona, monar visuar ruruia sa naña ve visokan re.*

<sup>11</sup> *Monar ligan naviowaena, kila ga wo. Monar m̄areran suñare, a monar p̄iyonli naña silaga were imi lavisi likan yeririna lala.*

<sup>12</sup> *Suñe suña pisu manene ruru ke yar naña kila ke po, ten kiligana pan leniena kien yar wo la ne sanene. Ana la naña akila ke piowa, maran m̄arera pan la, pilon ga m̄asina pan la.”*

*Yauena 34:12-16*

*Pogos naña akila piowa pa yeririna wo kiena ne Ntewa lala*

<sup>13</sup> Visae tom̄areranli naña tekila ruru sur make ga wo na wo, ve tesitom re tevisave yar lañas sinela kar ita vanon poli.

<sup>14</sup> Pona pogos tai avisu naña tesuña tekila ke po sa naña Ntewa sinenania, ana teilan ga asuñalu akila kare ita vanonia. Ana visae ve sanene, monar tevisu sane naviowaena nene pe pe sur re tai poli, naga navisa ruruena ga tai naña Ntewa m̄la pan ita. Tekilia tesitomañal visena na tus kiena ne yermarua navisawalena Aisea, naña pisa sanini, sape:



“Yar kiena ne Ntewa, ve sinemña kurkur re, ve omaraun re ya naña yeririna na yomarava la amaraunia.”

<sup>15</sup> Visena nene sape monar ve temarau re, ana ya naña monar tekila, e losineta, monar teligan Kristo ga su metavan sur make ga, naga taaga pe kieta Suņe. A monar tekila ruru ita silaga, sa naña visae naviunena tai imi viun sape komin ya ne temlelaga, komin ya ne toņasine Yesu, ana monar tekilia ruru ve sanape naña yoko tekilia tela navisataņeena tai naña po vano.

<sup>16</sup> A visae navisataņeena vano, monar va amio ga ŗelaga malum, a ŗelaga navatanonen yaru. La naña sinelan ke kila kareen la naña amlelaga e Kristo, akilia akoan visen viowa ve moki vim van amiu, ana avisuar amiu, pe pon re si akuan maran si visen viowa la van la poli. Visae akila ve sa nene, siraunia akilia amawan si kiamiu visena mārera la nene vaņisi, a visae amoņau ga van la, yoko la ga monar amawan si kiela visena mārera lala.

<sup>17</sup> Visae Ntewa sinenan sape naloge viowaena kilia vim mālivin ita pog tai, pe pon re naloge viowaena nene vim mālivi komin ga sur viowa laņas naña ita ga tekila poli. Ana popon manene laa naña visae naloge viowaena nene vim mālivin ita, komin ga suri wo la naña temiyumāen ke ne.

<sup>18</sup> Asitoņali Kristo, naga sanene. Naga pe yar mesmes manene laa, ana naga mloge piowa manene paņisi komin yar viowa lala. Kieta mlamulen viowa ita yeririna na yomarava lala mok liu, ana e kiena marena yam taaga nene

kila sur make rui naþa kila sane kieta mrapa sumã naþa kilia were ita teva lavisin Armata Ntewa. Akila kare mña tasnena Yesu sanene panoo marþan nenaga, ana po paþisi naþa siraunia, naga mal sina e namãreraena kiena Ninuna ne Ntewa.

<sup>19</sup> Ana sumon naþa mal si sanene, naþa mñeke e lelen marena naþa, namãreraen kiena Ninuna ne Ntewa pimi pulemamaga ea, kila naga pa mlologon meraravan pa ninuna taþena la naþa asike e nene, sape nagane Ntewa taulu la narui, ana Yermare naga kila þele nena yonia.

<sup>20</sup> Ninuna la nene, nane yeririna sur la naþa yepel mavin Ntewa, sane la nanua e pogos kiena ne yermarua Noa. E pogos nene Ntewa sumãte la ke sape avilon la, mla pog piavi pan la. La asumã ga sane, Noa miyumuãen mña kiena pupia waa nene, ana pe asitom re nenaga, ana pogos naþa womie pulemamaga la atalilu. La mok naþa akovio e pogos nene, ana yar la lua la ga naþa amal asike e pulu waa, nane Noa ga la orelu nene.

<sup>21</sup> Ana pupia wii naþa kus la amal e kiela waa nene, naga kana kinasnena ya ne pan ita nagane? Naga kila tesitomãl si wii taþena, wii na tamalia itaena, nane wii naþa akee ita ea. Wii nakeena na nene, naga pe kila re sa naþa yepeta la mekik poli, ana kiar ruru ita sape Ntewa piowo kieta mlamulen viowa lala, ana ve temawan re sina vania.

Nakeena naga mligan kieta malena tesu ruru tesike temio Ntewa narui, ana popon tesitomãl mña tesape ane kila kieta mrapa sanene? Yesu

Kristo ga kila, pimi kome kiena nasuñalen si petan marena.

<sup>22</sup> A siraun nene, ðasuñe si pa ma e peni, pa totano teke amio Ntewa e limana marua ma metava, naña navisi lala, a pupia yerkawa lala, amio ñareraena lala, la make ga asike vatanon kiena navesuñenena.

## 4

*Nasinenanena kiena ne Ntewa naga su ðes e kieta malena*

<sup>1</sup> Sa naña nepisa rui, Kristo naga tañan naña ðar naloge viowaena la moki e yepena, ana ita ñena ga monar tekila kieta sitomena ve sa ke ga nene. Yar naña tasnena mloge piowa, ve visa re visave viowa, komin naña visae naga va warpo yo e naloge viowaen ta sanene, kilia kila naga ñarera manene laa sane, vena liganen ðelaga na mlamulen viowa lala.

<sup>2</sup> Yar sur na sanene, naga pe pa manene re si e kiena malena na yomarava nini poli, naña sinenanena viowa na ðelaga kiena ne yeririna imi ve keviu manene e kiena sitomena, ana naga sitom ga sur mesmesu la naña Ntewa sinenania.

<sup>3</sup> Kieta malena, naña tekila kare komþas keviu pa rui, naña tesuñã tetelivi ke ga temio erau la naña pe amlelaga re poli. Ita temio la e malena viowa naña pule e nakila maneneen ðarita, na wereen sira lala, na mun maneneen wii pano tepe wowe, na veveyuena a na kilaen mara, na kilaen ñaagena kar la pano-o yemlagi, nakilaroen navisaluaen lala, amio nalotunen nono lala.

<sup>4</sup> Nane kieta malena ke na sumo narui, ana nagane, kieta erau nene amninue asape ita na sanape narui. Añal naña pe sinetan re si taveve laen poli vena kieta malena talilu e pulmaran kiela sukořene, ana pe akekaran re nenaga, kila sinela kar ita pařisi.

<sup>5</sup> Ana ve tesitom re suria, yar sur la ne sanene yoko asumñalu ase marana ne naga naña yoko liřere yar mal lala amio mñena yar la naña amarmare rui. Yoko monar avisawal kiela sur la vania, ana e pogos nene narui, yoko avisu kilale kiela napiowaena lala.

<sup>6</sup> Ana tařatete ve sanene va nalelagaena lala. Pona yar na yomarava la aliřerela ala nakoena na yomarava van tasnela, kilia va tol naña akilalu kiela malena. Ana pogos naña asumñalu ase marana ne Ntewa, yoko naga la nalaena na malena van ninula. A malena ne nane pe pupia sur naña kila tesuñña temlologon ke lologena wo van yaru lala.

*Pelaga kiena li nalelagaena lala e pogos naña legiena maro pimi ke lavis*

<sup>7</sup> Nesape nevisa sanini, sane lavis tetol luas nen sur make narui. E pog na sanene, nalelagaena lala monar asmñal ruruia naña kiela sitomen la ekik ruru wo, vena ve aursulan re leniena.

<sup>8</sup> A metavan sur tařena make ga, monar asitom manene la si vařisi, komin naña visae tesitom yar tai, kila sa naña meme ga na viewoen kiena mlamulen viowa lala. Visena tai pisa sanene rui, sape mlamulen viowa mok liu, ana nasinesiena kilia kalo la make ga.

9 Sur taþena, li nalelagaena lala la monar akekaran ga naþa avisuar la sina e mala una.

10 A la make mena lala monar akilia ruru namareraena amio nakiliaena taþena taþena lala naþa Ninuna mla pan la, monar ayunae ruru amio vena iilaen kiela erau taþena lala. Visae avisuar ruruia, akilia akila naþa yoko lemamiena wo kiena ne Ntewa imi warpo yo e la.

11 Yar naþa nakiliaena na visena teke ea, naga monar vis ruruia sa ga naþa visen kiena ne Ntewa ga lelaga suma þar wowo ke e pulgona. Yar naþa nakiliaen naiilaen yunaena sike ea, naga monar kila wo amio namareraen make ga naþa Ntewa mla pania. Visae silaga tekila make sur wo ve sa nene, yoko yar make akilia aieluar Ntewa vanonia, aieluar naga komin kia kiena ne Yesu Kristo, naþa naurarena make ga a namareraen make ga ape kiena ga vano vano ve uro re.

*Naloge viowaena kiena ne li nalelagaena lala*

12 Erau lala, nekilia nesape nagane apane ke pog na loge viowaena tai naþa kila amloge piowa paþisi. Ana sineun nesape nevisa van amiu, sa naþa ve ailan manene re, ve avisu re sur nene sane sur tai naþa asitom ke asape taþatete imi malivin amiu pog tai yo.

13 Ana ya ga naþa akila, akekaran ga naþa akilia ave þegas amio Kristo e kiena naloge viowaena lala. Visae sanene, yoko siraunia, pupia kekarena vaþisi van amiu, naþa akilia ave þegas si amio e pogos naþa imi maliv amio kiena naurarena.

<sup>14</sup> Visae tañena la akilia asape kia kiena Kristo sike e ko, yoko akilia akoven viuelen viowa la imi, ana ve ositom manene re. Yoko pupia navisa ruruena sulue ga e ko, komin naña Ninuna ne naurarena kiena ne Ntewa nae ma e peni sike e kionña malena.

<sup>15</sup> Visae ala nakoaena tai pona naloge viowaen tai imi van ko, pe pon re akila komin naña asape ko na yar na weñaren yaru, pona ope yar na vinauena, pona ope yar na kilaroen navisaluaena, pona ope yar na kilaen viowa yo.

<sup>16</sup> A visae akila komin ga naña akilia asape ko na omlelaga ke e Kristo, ve okila re sane omawa, ana monar oyeluar Ntewa naña pisu ko ke sape ko na otoroki naña kia kiena ne Yesu Kristo sike e ko.

<sup>17</sup> Nagane, pogos na liñereena siar ke rui, a yoko va ña tol ñesan mratava ñana ne Ntewa. A tepisu naña naga kilia tañan pog ñarera lañasia warpo yo e malena kiena narina lala, ana visae kila ve sa nene va la naña amlelaga, temninue kare narui aña yoko ve sanapen la naña pe sinelan re logearan kiena Lologena Wo poli.

<sup>18</sup> Nanene na sane visena tai na Tus marua na Visena na Manmaruaena naña pisa sanini, sape:  
*“Yar naña asitom asape naga mesmas rui, pe sur ñarera tai naña Ntewa kilia tamalia.”*

*Pakaiwa 11:31*

Ana visae ve sanene, ositomyuli yar la naña yepel mavin Ntewa, la ape yar na mlamulen viowa ga narui. Yoko ve sanapen la?

<sup>19</sup> Pogaga, e nene nevisa narin visen tai van amiu naña Ntewa tañan naloge viowaena pimi

m̃alivin amiu. Nesape asuṃña akilakila ga wo van yeririna make ga, a asuṃña aligan kiamiu malena sike e limana Ntewa. Naga pe Ntewa naṓa sii make suria, naga pe Ntewa naṓa masisun ruru sur make ga, a naga pe Ntewa naṓa tekilia towasine ruru naga silaga.

## 5

### *Visena pa pa nasumonen lala*

<sup>1</sup> Pogaga, nagane sineun nesape nevisawal sitomena laṓasia van amiu nasumonen lala na suṃnare. Nesitom nesape netorokin nevis van amiu sanene, komin naṓa in m̃ena nepe nasumonena, a metavania, in m̃ena tai naṓa nepisu Kristo e kilamarau, pogos naṓa kus ke naloge viowaena metava e lak torovia. Ana nekilia ruru nesape in m̃ena tai naṓa yoko nesike loyuni e naurarena la naṓa yoko imi sirau, nane nepisu sane popon nekila visen la nene vena iila amiu.

<sup>2</sup> Neviun manene tan amiu sanini, nesape monar avisuar ruru ṓegas nen sipsip la naṓa Ntewa mligan sike vatanon kiamiu navisuarena. Nanene na yuṃnaen tai naṓa keviu paṓisi, ana lelaga, pe pon re visae akila naṓa pe sinemiun re nakilaena poli. Ana popon akila ga amio sitomena naṓa kekaren nakilaena, sa naṓa Ntewa sinenania. Ana yuṃnaena ya naṓa akila, ve akila re ga komin narin nalaen tai naṓa yoko alavia, ana akila ga komin naṓa narin sitomen tai teke e amiu sape akila vena iilaen yar taṓena lala.

<sup>3</sup> A la naþa asike e limamiu vena avisuar la, ve akila re naþa akilali awarar manene laa, ana monar asumon ruru la, avian la e mrapa, ana akilia ataveve lelen lamiu.

<sup>4</sup> Visae ayumãae m̃a sanene vano, yoko þar na visuaren sipsip kiena ne Ntewa yoko kekaran amiunia. Pogos naþa imi m̃aliv sina, yoko visir plan amiu sane kiena þarin suþe lala, yoko vaia ruru amiu naþa kiena pupia navilavilaena naurarena vila e amiu naþa taþatete si vito tano pog tai.

*Visena pa yar taþena lala*

<sup>5</sup> Nagane visena imi van amiu kam m̃ee lala. Nepiun manene pan amiu nesape monar akekan naþa avatanon kiamiu yermarua lala a kiamiu nasumonena lala. Visen la ne sanene kam punu ga monar alavia, komin naþa popon silaga tekila þelaga na vatanoena van ita. Nanene sane visena tai na Tusi na Manmaruaena tai pisa nanua laa rui, naþa sape

*“Ntewa pisaluþar þelaga na vilaveena, ana miila þelaga na vatanoena.”* *Þakaiwa 3:34*

<sup>6</sup> Sanene, popon tekila kieta sitomena su lue ga vatanon Ntewa. Teligan ita e limana, ana e kiena m̃areraena yoko kilia visirlua ita si pogos tai.

<sup>7</sup> Teligan kieta naurmiena la sike e m̃asina, komin naga sitom ita paþisi, sinenan sape iila ita.

*Avisaluþar Yermare*

<sup>8</sup> Nesape nevisa m̃ena visena na weþege ami- uena tai, sane monar avisuar ruru amiu, monar avisu kilale towe laa mrapa. Kieta nasinekar



naña Yermare, naga telivwo ita lue ga, naga sane pupia sur mal tetan tai naña sane visokarian manene laa nalelagaena lala, visae sumãalun la karwowa kare la vitolwowa la vañisi.

<sup>9</sup> Ana ve atamãan re kila sanene, monar asumãal mñarera e kiamiu naviawaena vena avisaluñar ruru naga. Pe kam re ga naña naga sumãa kilali amiu ke poli, ana akilia rui sane kieta erau tañena la mok liu teliv e yomarava nini piora, naloge viowaena la pimi mñalivin la ke mñena ga, ana popon ita make ga tesumãal mñarera vena Yermare ve taulu re ita yar tai.

<sup>10</sup> Lelaga naña asumãa amloge piowa towe laa e pogos nene, ana kieta Ntewa nalemamiena make ga yoko iila amiu. Naga ke narui naña mligan plan amiu rui vena yoko amiu amio Kristo loyumãa e kiena pupia naurarena, a naga ke narui yoko ligam ruru amiu sina nagane. Yoko sinemiu ve kurkur re, yoko ve akulul re, ana e kiena namãareraena, yoko akilia aviawa ruru sina.

<sup>11</sup> Nane, teyeluar kieta Ntewa nene, komin kiena namãareraena sumãa taulu make suria, a yoko sumãa taulu vano-o tañatete ãisi pog tai, sanene narui.

### *Visena maro*

<sup>12</sup> Nesike e nini nemio kieta puruvi wo naña Saelas, noñasine ke naga e sur moki, a naga miila inu sirilua kiamiu mñaki nene. Nekilia nesape mñaki nene plas laa ga, nepis ve tokak ga, ana ya naña sike ea, nekilia nesape pisawal ruru

ṗelaga wo tanea lala na lemamiēna kiena ne Ntewa pe lelaga, naṗa torokin amiu naṗa asike e nagane. Ve sanene, auloia, alavia vena iilaen kiamiu sitomen lala, silaga asuṗalu ṗarera ase ea.

<sup>13</sup> Lala na suṗare nae nini Rom, amio ṗena Mak, naṗa nemla naga sa ga naruu narui, apisa po kolulag pona pokolemalo pan amiu. Mesike e nini, mepisu piowa towe ga, memloge sane mesike e pupia pulkumali viowa nasumo naṗa asape Papilon. Ana naga pogaga, komin naṗa mekilia mesape Ntewa mligan plan imimi naṗa memio amiu, ita teve kiena.

<sup>14</sup> Nevisa maron sanini, nesape pogos naṗa aim lele taaga, aworworun amiu, amun pipimiu sa naṗa akekaran ruru amiu.

Ana kiau leniena sa naṗa suṗarena wo kiena ne Yesu Kristo sike make amio amiu naṗa ape kiena.

Inu, Pita.

**Lologena Wo Kienane Yesu Kristo Kome  
Kewo  
The New Testament in the Lewo Language of Epi  
Island, Vanuatu  
Le Nouveau Testament en Lewo langue de l'île d'Épi  
au Vanuatu — Niutestamen long Lewo lanwis, blong  
Epi Aelan, Vanuatu**

copyright © 2016 Wycliffe Bible Translators, Inc.

Language: Lewo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 28 Dec 2024 from source files dated 31 Aug 2023

ee028e1c-7e53-571d-8041-681daaf580e8